



Lescha davart la promoziun dil lungatg romontsch dalla vischnaunca Ilanz/Glion (lescha per promover il lungatg; LL)

dils xx-xx-2015

Il parlament communal dad Ilanz/Glion,

sebasond sin art. 7 al. 4 e 35 lit. a dalla constituziun communal dad Ilanz/Glion (CC; LIG 11.1) e suenter haver priu envesta dil messadi dalla suprastonza communal dils 13 d'avrel 2015,

decida:

I. Disposiziuns generalas

Art. 1 Object

Quella lescha reglescha las mesiras per mantener e promover il lungatg romontsch ella vischnaunca dad Ilanz/Glion sco era la collaboraziun cun autras corporaziuns da dretg public ed organisaziuns privatas.

II. Administraziun communal

Art. 2 Persunas emploiadas ed engaschaments

¹ La vischnaunca promova las enconuschentschas dil romontsch da siu personal.

² Cura ch'ei va per occupar plazzas ell'administraziun communal ei en cass da qualificaziuns egualas da preferir per regla quella candidata ni quei candidat che ha enconuschentschas dil romontsch.

III. Promoziun dil lungatg romontsch

Art. 3 Contribuziuns periodicas ad instituziuns

¹ La vischnaunca conceda ad organisaziuns privatas che han la finamira da promover il lungatg romontsch contribuziuns periodicas annualas per il manteniment e la promoziun dil lungatg romontsch e dalla cultura romontscha.

² La concessiun dallas contribuziuns communalas dependa dall'observaziun da cunvegns da prestaziun denter la vischnaunca e las organisaziuns privatas, las qualas vegnan stipuladas mintgamai per ina perioda dad in tochen quater onns.

³ Organisaziuns privatas che vegnan sustenidas ston presentar alla suprastonza communal il preventiv, il rapport annual ed il quen annual.

Art. 4 Projects e mesiras da promoziun specialas

¹ La vischnaunca conceda contribuziuns a corporaziuns da dretg public sco era ad organizaziuns privatas en favur da mesiras e projects per il manteniment e la promoziun dil lungatg romontsch e per la capientscha denter las cuminonzas linguisticas communalas.

² Las contribuziuns communalas sedrezzan surtut tenor la qualidad dalla mesira e tenor siu effect per il manteniment e la promoziun dil lungatg.

³ Las contribuziuns communalas dependan dad atgnas prestaziuns commensuradas dils beneficiaris dallas contribuziuns. Projects che han principalmein ina finamira da gudogn vegnan buca susteni cun contribuziuns.

Art. 5 Mesiras e projects dalla vischnaunca

¹ La vischnaunca pren atgnas mesiras e realisescha agens projects per mantener e promover il lungatg romontsch, cunzun sch'il maun privat realisescha mo paucas mesiras.

² La vischnaunca sustegn persunas sesentas ella vischnaunca en lur aspiraziun d'emprender romontsch.

IV. Disposiziuns executivas e disposiziuns finalas**Art. 6 Execuziun**

La suprastonza communalala ei responsabla per l'execuziun da quella lescha. Ella sa re-laschar in'ordinaziun persuentar.

Art. 7 Entrada en vigur

¹ La lescha presenta ei suttamessa al referendum facultativ.

² La suprastonza communalala determinescha, cura che quella lescha va en vigur.¹

³ Cun l'entrada en vigur da quella lescha ein las disposiziuns che stattan en cuntradicziun cun ella abrogadas.

¹ Mess en vigur sils x-x-2015 cun decisiun dalla suprastonza communalala dils x-x-2015.